

**Uunga siunnersuut: Inuit innarluutillit tapersorsorneqarnissaannut Inatsisartut  
inatsisaata allangortinneqarnissaannut Inatsisartut inatsisaat**

**aamma**

**Meeqqat tapersorsorneqarnissaannut Inatsisartut inatsisaata  
allangortinneqarnissaannut Inatsisartut inatsisaat**

(Meeqqanut, Inuusuttunut, Ilaqutariinnut Inatsisillu Atuutsinneqarnerannut Naalakkersuisoq)  
**pillugu**

**Ilaqutariinnermut Peqqissutsimullu Ataatsimiititaliap**

**Siunnersuutit aappassaaneerpeqarneranut**

**ISUMALIUTISSIISSUTAA**

Ataatsimiititaliap suliarinninnermini uku ilaasortarai:

Inatsisartunut ilaasortaq Agathe Fontain, Inuit Ataqatigiit, siulittaasoq  
Inatsisartunut ilaasortaq Anna Wangenheim, Demokraatit, siulittaasup tullia  
Inatsisartunut ilaasortaq Mikivsuk Thomassen, Inuit Ataqatigiit  
Inatsisartunut ilaasortaq Knud Mathiassen, Inuit Ataqatigiit  
Inatsisartunut ilaasortaq Mette Arge-Hammeken, Naleraq  
Inatsisartunut ilaasortaq Jess Svane, Siumut  
Inatsisartunut ilaasortaq Mala Høy Kukó, Siumut

UKA2021-imi septemberip 29.-ani siullermeerinerup kingorna siunnersuut ataatsimiititaliap misissorpaa.

**Siunnersuutit imarisaa siunertaalu**

Immikkoortuni allanguutit ukiumoortumik tikeraarluni angalanissamut pisinnaatitaaffeqarneq pineqarpoq. Immikkoortoq 128-mi allanguutit inuit innarluutillit tapersorsorneqarnissaat pillugu Inatsisartut inatsisaata allangortinneqarnissaanik kinguneqassaaq, taamaalilluni akiliunneqarluni ukiumoortumik angalasarnerit inunnut innarluuteqartunut pineqaatissinneqarsimanertik imaluunniit eqqartuussiviup aalajangiinera pissutigalugu ulloq unnuarlu neqeroorutinut inissinneqarsimasunut atuutsinneqarani. Immikkoortoq 129-mi allanguutit meeqqat tapersorsorneqarnissaat pillugu Inatsisartut inatsisaata allangortinneqarnissaanik kinguneqassaaq tamatumalu kinguneranik meeqqat 15-t 18-llu akornanni ukiullit pineqaatissinneqarsimanertik imaluunniit eqqartuussiviup aalajangiinera

pissutigalugu ulloq unnuarlu angerlarsimaffinnut inissinneqarsimasunut ukiumoortumik akiliunneqarluni angalasarnerit atuutsinneqaratik.

### **Siunnersuutit Inatsisartunit siullermeerneqarnera**

Siunnersuutigineqartut partiinit tamanit tigulluarneqarput, taamaalillunilu Ilaqutariinnermut Peqqissutsimullu Ataatsimiititaliamut ingerlateqqinneqarnissaa inassutigineqarluni.

### **Tusarniaanermi akissuteqaat**

Tusarniaanermi akissuteqaatit tunniunneqartut inatsisissatut siunnersuutitut ilanngussatut ilanngunneqarput, taamaalilluni Inatsisartut Siulittaasoqarfiata ilusiliinissamut piumasaqaataanut naapertuullutik.

### **Siunnersuutip aningaasatigut allaffissornikkullu kingunerisassai**

Siunnersuutip akuerineqarneratigut aningaasatigut kinguneqarnavianngitsoq siunnersuutit nalinginnaasumik nassuiaataani allassimavoq. Saqqummiunneqartut tunngavigalugit allatut naliliinissaminut ataatsimiititaliaq pissutissaqanngilaq.

### **Ataatsimiititaliap siunnersuummik suliarinninnera**

Ulloq 8. oktober immikkoortunik suliaqarnerminut atatillugu ataatsimiititaliaq Meeqqanut, Inuusuttunut Ilaqutariinnermullu Naalakkersuisumik itinerusumik paasisassarsiorluni ataatsimeeqateqarpoq, tamatumunngalu atatillugu pitsaasumik paasisaqarfiusumillu ataatsimeeqatigiinnermut qujalluni. Ataatsimiinnerup ingerlanerani paasinarsivoq inatsisip qanoq paasineqarnissaa siusinnerusukkut ajornartorsiutaasimasooq, pingaartumik tikeraarluni angalanissanut kikkut akiliisussaanersut pillugu. Meeqqat inuusuttullu 18-t inorlugit ukiullit pineqaatissinneqarsimanertik pissutigalugu angajoqqaaminnit tikeraarneqarsinnaanngitsut ilanngullugu paasissutissiissutigineqarpoq.

Meeqqat inuusuttullu pisinnaatitaaffii pineqartut isumaqatigiissutit atuuttut naapertorlugit matumani pingaartumik ilanngullugit FN-p meeqqat pillugit isumaqatigiissutaat aamma Europamiut inuit pisinnaatitaaffii pillugit isumaqatigiissutaat unioqqutinneqannginnissaat siunnersuutigineqartut akuersissutigineqarneranni qulakkeerneqassasoq ataatsimiititaliap Naalakkersuisunut **kaammattuutigaa**.

### **Ataatsimiititaliap inassuteqaatai**

- Siunnersuutigineqartut akuerineqassasut ataatsimiititaliap isumaqatigiittup inassutigaa
- Meeqqat inuusuttullu atugaasa FN-p Meeqqat pillugit Isumaqatigiissutaanut akerliunnginnissaata qulakkeerneqarnissaa pillugu Naalakkersuisunut

ataatsimiititaliap isumaqatigiittup qinnutigaa

Taamatut oqaaseqarluni isumaliutissiissummilu allassimasutut paasinnilluni matumuuna siunnersuutit ataatsimiititaliap aappasaaniigassanngortippai.

Agathe Fontain

---

Ateq  
Siulittaasoq

Anna Wangenheim

---

Mikivsuk Thomassen

---

Ateq  
Siulittaasup tullia

Knud Mathiassen

---

Mette-Arqe Hammeken

---

Jess Svane

---

Mala Høy Kukó

---